

**Buat siaran langsung prosiding PAC mengenai 1MDB - Saifuddin
Astro Awani
06 Jun 2015
By Israr Khalid**

KUALA LUMPUR: Gerakan Kesederhanaan Global (GMM) mencadangkan supaya mesyuarat Jawatankuasa Kira-Kira Wang Negara (PAC) mengenai 1MDB disiarkan secara langsung melalui televisyen.

Ketua Pegawai Eksekutif GMM, Datuk Saifuddin Abdullah berkata apa yang berlaku di Dialog #Nothing2Hide 'PM Bersama NGO' semalam mencerminkan masalah 1MDB sangat dekat di hati masyarakat.

"Semalam menunjukkan rakyat benar-benar ingin tahu masalah yang melanda 1MDB dan mereka mahukannya diselesaikan," tegas Saifuddin dalam sidang media selepas Himpunan Rangkaian Gerakan Muslim Asia (AMAN) kelima di sini hari ini.

Mengulas lanjut, beliau berpendapat debat bukanlah cara terbaik menyelesaikan isu 1MDB.

Sebaliknya, isu kehilangan wang berbilion ringgit oleh syarikat itu perlu diselesaikan melalui cara PAC.

"Oleh kerana rakyat ingin tahu, sesi prosiding perlu disiarkan secara langsung supaya rakyat boleh lihat sendiri apa yang dibincangkan," ujar Saifuddin yang juga bekas Ahli Majlis Tertinggi UMNO.

Presiden Pertubuhan Pribumi Perkasa Malaysia (Perkasa) Datuk Ibrahim Ali semalam turut mencadangkan dialog antara Perdana Menteri Datuk Seri Najib Razak bersama mantan perdana menteri Tun Dr Mahathir Mohamad diadakan di kaca televisyen untuk tontonan umum.

Dialog #Nothing2Hide 'PM Bersama NGO' yang dijadual berlangsung pada Jumaat dibatalkan di saat-saat akhir oleh Ketua Polis Negara Tan Sri Khalid Abu Bakar atas alasan keselamatan.

Copyright © Astro Awani Network Sdn. Bhd. 2014 (535275-D).

Source: <http://www.astroawani.com/berita-malaysia/buat-siaran-langsung-prosiding-pac-mengenai-1mdb-saifuddin-61768>